

**Umat Islam Wajar Pertahan Keamanan, Keharmonian Dan Kestabilan Negara -
Muhyiddin
Bernama
7 Ogos, 2013**

KUALA LUMPUR, 7 Ogos (Bernama) -- Timbalan Perdana Menteri Tan Sri Muhyiddin Yassin berkata umat Islam wajar mempertahankan keamanan, keharmonian dan kestabilan yang dikecapi di negara ini.

Beliau berkata perpaduan dan kemakmuran di Malaysia telah terbina sejak sekian lama dan ia bukanlah sesuatu yang dinikmati dalam sekelip mata.

Katanya Islam juga mengajar agar menghormati antara satu sama lain dan penghormatan terhadap nilai-nilai agama yang dipegang oleh seseorang adalah kunci kepada keamanan dan keharmonian dalam hubungan sesama manusia.

"Perpaduan sesama ummah adalah elemen paling penting dalam mempertahankan agama Islam. Kekuatan ummah hanya akan terbina sekiranya kita bersatu padu tanpa mengira perbezaan ideologi politik atau mazhab.

"Marilah kita sama-sama mengeratkan silaturrahim, menguatkan ukhuwah dan mengenyepikan sebarang persengketaan demi memartabatkan kesucian agama Islam," katanya dalam perutusan khas sempena Hari Raya Aidilfitri.

Dalam pada itu, Muhyiddin turut mengingatkan rakyat di negara ini supaya tidak melupakan rakyat di negara yang sedang porak peranda akibat persengketaan.

Katanya rakyat di negara ini perlu bersyukur kerana Aidilfitri disambut dalam suasana yang aman dan harmoni.

"Tiada pergolakan dan tiada kecelakaan besar yang melanda negara kita seperti yang dialami oleh umat Islam di beberapa negara lain.

"Kita doakan agar keamanan segera tertegak di Syria, Mesir, Palestin dan negara-negara Islam lain yang sedang bergolak," katanya.

Sempena sambutan Aidilfitri, Muhyiddin mengajak rakyat agar memanfaatkan peluang yang ada untuk mengeratkan hubungan silaturrahim dengan mengunjungi sahabat handai dan rakan taulan.

Beliau juga mengingatkan pengguna jalan raya yang memandu pulang ke kampung agar berhati-hati dan banyak bersabar ketika di jalan raya.

"Di kesempatan ini saya dan isteri, serta seisi keluarga mengucapkan Selamat Hari Raya Aidilfitri, Maaf Zahir dan Batin kepada seluruh umat Islam di Malaysia juga umat Islam di mana saja mereka berada," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=968932>

